



Broj/Број: 03-/4-50-1-10-17-9/08
Sarajevo/Сарајево: 7. 11. 2008.godine

ZAPISNIK

17. sjednice Zajedničke komisije za evropske integracije Parlamentarne skupštine BiH, održane 6. 11. 2008. godine

Sjednica je počela u 10 sati.

Sjednicu Zajedničke komisije za evropske integracije Parlamentarne skupštine BiH sazvaо je predsjedavajući Halid Genjac.

Sjednici su prisustvovali članovi Zajedničke komisije za evropske integracije: Halid Genjac, Alma Čolo, Drago Ljubičić, Hilmo Neimarlija, Ivo Miro Jović, Rudo Vidović, Šemsudin Mehmedović, Milica Marković, Selim Bešlagić i Azra Hadžiahmetović, te Vlatka Dangubić, sekretar Komisije, i Vladana Lučić, stručni saradnik u Komisiji. Članovi Komisije Zoran Koprivica i Branko Dokić opravdano su odsustvovali. Sjednici su prisustvovali i predsjedavajući klubova poslanika Predstavničkog doma Bakir Izetbegović i Momčilo Novaković, kao i predsjedavajuća kluba delegata srpskog naroda u Domu naroda Dušanka Majkić.

Sjednici su prisustvovali: Dimitris Kurkulas, šef Delegacije Evropske komisije u BiH, Boris Iarkodijević, savjetnik ambasadora Kurkulasa, i Đulio Zani, politički savjetnik u Delegaciji Evropske komisije, predstavnici OHR-a, predstavnici ACIPS-a, te predstavnici bh. medija.

DNEVNI RED

1. Prezentacija redovnog Godišnjeg izvještaja o napretku BiH u procesu evropskih integracija za 2008. godinu.

Ad. 1. Prezentirajući Izvještaj Evropske komisije o napretku BiH Dimitris Kurkulas, šef Delegacije Evropske komisije u BiH, naglasio je da je Bosna i Hercegovina ostvarila napredak u ispunjavanju političkih kriterija u toku prve polovine 2008. godine. On je rekao da je, osim dešavanja koja su dovela do potpisivanja Sporazuma o stabilizaciji i pridruživanju, BiH nastavila provoditi strategiju reforme javne uprave i usvojila državni plan za razvoj pravnog sektora. Državni sud nastavio je procesuirati ratne zločine a suđenja se generalno odvijaju u razumnom

vremenskom roku i u skladu s međunarodno priznatim principima. Općinski izbori, održani u oktobru 2008. godine, provedeni su u skladu s međunarodnim standardima. Međutim, nedostatak konsenzusa u vezi s glavnim karakteristikama jačanja države, stalni izazovi Dejtonskog/Pariskog mirovnog sporazuma i zapaljiva retorika nepovoljno su uticali na funkcioniranje institucija i usporili reforme sredinom ove godine. On je naglasio da vlasti u BiH još uvijek nisu pokazale dovoljno kapaciteta da preuzmu neophodna politička ovlaštenja i odgovornost. Uloga koju igra etnički identitet u politici narušava funkcioniranje demokratskih institucija i cjelokupne vladavine unutar zemlje. Nikakav napredak nije ostvaren u vezi sa ustavnom reformom. Korupcija ostaje široko rasprostranjena i predstavlja ozbiljan problem.

Govoreći o ekonomskim kriterijima, sadržanim u redovnom godišnjem Izvještaju, Dimitris Kourkoulas rekao je da se ekonomija Bosne i Hercegovine nastavila rapidno širiti i da je zemlja ostvarila izvjestan, mada nejednak, napredak ka postojanju funkcionalne tržišne ekonomije.

Makroekonomska stabilnost oslabila je što je rezultat pogoršanja trgovinskog balansa, veće inflacije i rastuće fiskalne politike. Stalno prisutna veoma visoka stopa nezaposlenosti ostaje glavni izvor zabrinutosti. Međutim, fiskalna koordinacija je poboljšana. Fiskalno vijeće BiH zvanično je počelo raditi početkom septembra. Sektor malih i srednjih preduzeća iskoristio je povećan pristup finansijskim sredstvima. Međutim, pomak u strukturi proizvodnje ka aktivnostima koje imaju veću dodatu vrijednost ostaje usporen i prednost ka strukturalnoj reformi i dalje je neujednačena u zemlji. I dalje se mora nastaviti s provođenjem značajnih reformi kako bi se BiH omogućilo da se dugoročno suoči s konkurentskim pritiscima i tržišnim snagama u Evropskoj uniji.

Govoreći o evropskim standardima, naglašeno je da je napredak ostvaren na polju carina, poreza, poljoprivrede, transporta, vizne administracije, upravljanja granicama, azila i migracije.

I pored ostvarenog napretka, zemlja treba da pojača svoja nastojanja i u drugim oblastima, kao što su slobodno kretanje robe, lica i usluga, zapošljavanje i socijalna politika, državna pomoć, energija, okoliš i statistika. Također je neophodno ostvariti bolje rezultate u borbi protiv organiziranog kriminala, borbi protiv trgovine drogom, kao i pranju novca.

Na kraju prezentacije redovnog godišnjeg Izvještaja, Dimitris Kurkulas izrazio je uvjerenje da BiH ima mnogo više potencijala, te da treba pojačati napore za ulazak u EU.

S tim ciljem, naglasio je potrebu za boljom koordinacijom državnog s entitetskim parlamentima te potrebu za intenzivnijom komunikacijom Parlamentarne skupštine BiH s Vijećem ministara BiH kako bi se postigla veća efikasnost u pripremi i usvajanju neophodnih zakona na putu integriranja BiH u EU.

Nakon prezentacije Dimitrisa Kurkulasa, članovi Komisije iznijeli su svoje komentare i pitanja:

Šemsudin Mehmedović rekao je da su u Izvještaju samo dotaknuti problemi koji se odnose na urušavanje Javnog RTV sistema u BiH kao i problem regulatornih agencija. On je također ukazao na potrebu intenzivnije i svrsishodnije saradnje Vijeća ministara BiH i Parlamentarne skupštine BiH.

Azru Hadžiahmetović interesiralo je mišljenje šefa Delegacije Evropske komisije da li će se usporavanje rasta evropske i svjetske ekonomije odraziti na dalje proširenje Unije, te na koji će se način to reflektirati na proširenje Unije zemaljama Zapadnog Balkana.

Selim Bešliagić predložio je da Evropska komisija pozove predstavnike entitetskih parlamenta, entitetske premijere, predstavnike Brčko Distrikta BiH kako bi svi zajedno postigli sporazum o nadležnostima koje će biti prebačene na Parlamentarnu skupštinu BiH. On je ukazao na potrebu direktnog i efikasnijeg dijaloga predstavnika Evropske unije s Bosnom i Hercegovinom, te ubrzavanje reformskih procesa neophodnih za dobivanje statusa kandidata.

Milica Marković zatražila je da se ispravi netačna informacija navedena u Izvještaju, u kojoj se kaže da je bilo određenih pokušaja vlasti Republike Srpske da ugroze pravilan rad Državne agencije za istrage i zaštitu. Ona je također zatražila da se preispita uloga i uticaj OHR-a, a posebno njegova uloga u smislu dobivanja statusa kandidata za BiH.

Drago Ljubičić je, komentirajući predstojeću reformu Ustava BiH i popis stanovništva u BiH, rekao da ima utisak da se određenim zakonskim rješenjima želi uticati na Ustav BiH. Kada je u pitanju popis stanovništva, rekao je da ne prihvata tezu da je etnička slika iz 1991. godine promijenjena samo u Republici Srpskoj, nego da je ona promijenjena i u Federaciji BiH.

Rudo Vidović ukazao je na jedan od najvećih izazova u narednom periodu, a to je usklađivanje bh. zakona s EU legislativom, i u tom kontekstu naglasio potrebu za stručnim i osposobljenim kadrovima u oblasti evropskog zakonodavstva. On je pitao predstavnike Delegacije Evropske komisije može li BiH očekivati pomoć EU kada je u pitanju osposobljavanje i školovanje mladih kadrova koji će raditi na harmonizaciji zakonodavstva.

Halid Genjac zahvalio je predstavnicima Delegacije Evropske komisije i naglasio da će već na jednu od narednih sjednica Komisije biti pozvani predstavnici Delegacije EK, te da će to biti prilika da članovi naše komisije u direktnom dijalogu s predstavnicima Delegacije EK razgovaraju o sadržaju redovnog godišnjeg Izvještaja o napretku kao i o sadržajima druga dva dokumenta Sporazuma o stabilizaciji i pridruživanju i Evropskog partnerstva.

Ad. 2. Usvajanje zapisnika 15. i 16. sjednice Komisije

Članovi Komisije jednoglasno su usvojili zapisnike 15. i 16. sjednice Komisije.

Sjednica Komisije završena je u 12, 30 sati.

Predsjedavajući
Zajedničke komisije
Halid Genjac

